

先代舊事本紀卷第八

神皇本紀

應神天皇。

諱-譽田皇太子尊，足仲彥天皇第四皇子也。母曰-氣長足姬尊，則開化天皇五世孫也。

天皇以皇后討新羅之年，歲次庚辰冬十二月，生筑紫之蚊田。

幼而聰達，玄監深遠，動容進止，聖表有契矣。

皇太后攝政三年，立為皇太子。時年四歲。書紀作三歲。

初天皇在孕而天神地祇授三韓矣。既產之，宍生腕上，其形如輶，是肖皇太后為雄裝之負輶。故稱名曰-譽田尊。

攝政六十九年夏四月，皇太后崩。

元年春正月，丁亥朔，皇太子尊即天皇位。都輕島地，謂-豐明宮。

二年春三月，庚戌朔壬子，立-仲姬命為皇后，誕生三兒。此條，日本長曆作夏四月。

兒，荒田皇子。

次，大鷦鷯尊。

次，根鳥皇子也。

先是，天皇以皇后姊-高城入姬命為妃，生四兒。

額田大中彥皇子。

次，大山守皇子。

次，去來真稚皇子。

次，大原皇子也。

次妃，皇后弟-弟姬，三生兒。

兒，阿倍皇女。

次，淡路三原皇女。

次，菟野皇女。

次妃，物部-多遲麻大連女-香室媛，生三皇子。

兒，兔道稚郎皇子尊。

次，矢田皇女。

次，雌鳥皇女。

次妃，香室媛之弟-小甕媛。

生，菟道稚郎姬皇女。

次妃，河派仲彥女-弟媛。

生，稚野毛二派皇子。

次妃，櫻井田部連男鉏妹-絲媛。

生，隼總別皇子。

次妃，日向泉長媛。

生，大葉枝皇子。

次，小葉枝皇子。

凡是天皇男女，合二十王也。

四十年春正月，辛丑朔戊甲，天皇召大山守命・大鷦鷯尊，問之曰：「汝等者愛子耶？」對言：「甚愛也。」亦問之曰：「長與少，孰尤焉？」大山守命對言：「不逮于長子。」於是天皇有不悅之色。時大鷦鷯尊預察天皇之色，以對言：「長者多經寒暑，既為成人，更無愜矣。唯少子者，未知其成不，是以少子甚憐之。」天皇大悅曰：「汝言寔合朕之心！」

是時天皇常有立菟道稚郎子為太子之情，然欲和二皇子之意，故發是問。是以不悅大山守命之對言也。即立菟道稚郎子為嗣。

即日，任大山守命，令掌山川林野，以大鷦鷯尊為太子輔，之令知國事，以物部印葉連公為大臣。此條，書紀作甲子也。

四十一年春二月，甲午朔戊申，天皇崩于豐明宮。時年百一十歲。

天皇所生皇子十七兒。男十二王，女五王。

子，荒田皇子。

次，大鷦鷯尊。

次，根鳥皇子。大田君等祖。

次，額田大仲彥命皇子。

次，大山守皇子。土方公等祖・榛原君等祖。

次，去來真稚皇子。深河別等祖。

次，大原皇子。

次，菟道稚郎子太子尊。

次，稚沼笥二俣皇子尊。三國君等祖。

次，隼總別皇子。

次，大葉枝皇子。

次,小葉枝皇子.
次,矢田皇女,仁德天皇后也.
次,阿倍皇女.
次,淡路御原皇女.
次,紀菟野皇女.
次,雌鳥皇女.

仁德天皇.

諱-大鷦鷯尊者,譽田天皇之第四皇子也.母曰-皇后-仲姬命,五百城入彥皇子命之孫也.

天皇幼而聰明叡智,容貌美麗.及壯,人寬慈惠.

四十一年春二月,譽田天皇崩.

于時,皇太子-菟道稚郎子讓位于大鷦鷯尊,未即帝位.仍諮大鷦鷯尊:「夫,君天下以治萬民者,蓋之如天,容之如地.上有驩心,以使百姓,百姓欣然,天下安矣.今我也弟之,且文獻不足,何敢繼嗣位,登天業乎?大王者風姿岐嶷,仁孝遠聆,以齡且長,足為天下之君.其先帝立我為太子,豈有能才乎?唯愛之者也.亦,奉宗廟社稷,重事也,僕之不佞,不足以稱.夫昆上而季下,聖君而愚臣,古今之常典焉.願王勿疑,須即帝位,我則為臣之助耳.」

大鷦鷯尊對言:「先皇謂:『皇位者,一日之不可空.』故預選明德,立王為貳,祚之以嗣,授之以民,崇其寵章,令聞於國.我雖不賢,豈棄先帝之命,輒從弟王之願乎?」

故辭不承,各相讓之時,額田大中彥皇子將掌倭屯田及屯倉,而謂其屯田司-出雲臣祖-淤宇宿禰曰:「是屯田者自本山守地.是以今吾將治矣.爾不可掌.」時淤宇宿禰啟于皇太子.皇太子謂曰:「汝便啟大鷦鷯尊.」於是淤宇宿禰啟大鷦鷯尊曰:「臣所任屯倉者,大中彥皇子拒不令治.」

大鷦鷯尊問倭直祖-麻呂曰:「倭屯田者,元謂山守地,是如何?」對言:「臣之不知.唯臣弟-吾子籠知也.」適是時,吾子籠遣於韓國而未還.爰大鷦鷯尊謂淤宇宿禰曰:「爾躬往於韓國,以喚吾子籠.其兼日夜而急往!」乃差淡路之海人八十為水手.爰淤宇往于韓國,即率吾子籠而來之.

因問倭屯田,對言:「傳聞之,於纏向珠城宮御宇天皇之世,科太子-大足彥尊,定倭屯田也.是時敕旨:『凡倭屯田者,每御宇帝皇之屯田也.其雖帝皇之子,非御宇者不得掌矣.』是謂山守地者非矣.」大鷦鷯尊遣吾子籠於額田大中彥皇子,而令知狀.大中彥皇子更無如何焉.乃知其惡而赦之勿罪.

然後大山守皇子每恨先帝廢己非立而重有是怨.則謀之曰:「我殺太子,遂登帝位.」

爰大鷦鷯尊預聞其謀,密告太子,備兵令守之.時太子設兵待之.大山守皇子不知其備兵,獨領數百兵士,夜半發而行之.

會明,詣菟道,將渡河.時太子服布袍,取楫櫓,密接渡子,以載大山守皇子而濟.至于河中,詭渡子,蹈船而傾.於是大山守皇子墮河而沒,更浮流之.然伏兵多起,不得著岸,遂沉而死焉.令求其屍,泛於哮羅濟.時太子視其屍,謂曰,云云,別在和歌記.

既而興宮室於菟道而居之,猶由讓位於大鷦鷯尊,以久不即皇位.

空之既經三載,有海人齋鮮魚之苞苴,獻于菟道宮也.太子命海人曰:「我非天皇.」乃返之令進難波.大鷦鷯尊亦返,以令獻菟道.於是海人之苞苴鰓於往還.更返之,取他鮮魚亦獻焉.讓如前日,鮮魚亦鰓.海人苦於屢還,乃棄鮮魚而哭.故諺曰:「有海人耶,因己物以泣.」其是緣矣.

太子曰:「我知不可奪兄王之志.豈久生之煩天下乎?」乃自死焉.時大鷦鷯尊聞太子薨,以驚之從難波馳之,到菟道宮.爰太子薨之經三日.時大鷦鷯尊擗叫哭,不知所如,乃解髮跨屍,以三呼曰:「我弟皇子!」乃應時而活,自起以居.大鷦鷯尊語太子曰:「悲兮!惜兮!何所以歟自逝?若死者有知,先帝何謂我乎?」

乃太子啟兄王曰:「天命也,誰能留焉?若有向天皇之御所,具奏兄王聖之,且有讓矣.然聖王聞我死,以急馳遠路,豈得無勞乎?」乃進同母妹-矢田皇女曰:「雖不足納采,僅充掖庭之數.」乃且伏棺而薨矣.於是大鷦鷯尊素服為之發哀,哭之甚慟.仍葬於菟道山上也.諸陵寮式云,宇治墓,菟道稚郎子皇子,在山城國宇治郡.

元年歲次癸酉春正月,丁丑朔己卯,大鷦鷯尊即天皇位.尊皇后曰-皇太后.都遷難波,謂-高津宮.

初天皇生日,木菟入于產殿.明旦,譽田天皇喚大臣武內宿禰語之曰:「是何瑞也?」大臣對言:「吉祥也.復當昨日臣妻產時,鷦鷯入于產屋.是亦異焉.」天皇曰:「今朕之子與大臣之子同日共產,並有瑞,是天之表焉.以為,取其鳥名,相易名子,為後葉之契也.」則取鷦鷯名,以名太子,曰-大鷦鷯皇子;取木菟名,號大臣之子,曰-木菟宿禰.是平群臣之始祖也.太子當作皇子乎.釋日本紀云,鷦鷯皇子尚無皇子之號,可謂史之誤也.神名帳云,大和國平群坐紀氏神社,伊勢國員鄉郡平群神社.三代實錄云,大內記味酒首-文雄,疑稱木菟宿禰之後,賜味酒臣姓,被貫伊勢國.

二年春三月,辛未朔戊寅,立磐之媛命為皇后,誕生四兒.

大兄去來穗別天皇.

次,住吉仲皇子.

次,瑞齒別尊.

次,雄朝津間稚子宿禰尊.

妃,日向髮長媛.

生,大草香皇子.

次,幡梭皇女.

二十二年春正月,天皇語皇后曰:「納矢田皇女,將為妃.」時皇后不聽矣.

三十一年春正月,癸丑朔丁卯,去來穗別尊立為皇太子。
三十五年夏六月,皇后-磐之媛命,薨於筒城宮。
三十七年冬十一月,甲戌朔乙酉,葬皇后於那樂山。

三十八年春正月,癸酉朔戊寅,矢田皇女立為皇后。
八十二年春二月,乙巳朔,詔侍臣-物部大別連公曰:「皇后久經數年不生皇子.以爾大別定皇子代。」后號為氏,以為氏造,改賜矢田部連公姓。
八十七年歲次己亥春正月,十六日,天皇崩。
冬十月,癸未朔己丑,葬於百舌鳥野陵。

天皇所生皇子,五男一女。
大兄去來穗別尊。
次,住吉仲皇子。
次,瑞齒別尊。
次,雄朝孀稚子宿禰尊。
次,大草香皇子。
次,幡梭皇女。

履中天皇。

諱-去來穗別尊者,大鷦鷯天皇第一太子也.母曰-皇后-磐之媛命,葛城襲津彥女也.古事記作-葛城之曾都毘古之女。
大鷦鷯天皇三十一年春正月,立為皇太子.時年十五。
八十七年春正月,大鷦鷯天皇崩。
元年歲次庚子春二月,壬午朔,皇太子尊即天皇位。
尊皇后曰-皇太后.尊皇太后追贈-太皇太后.都於磐余,謂-稚櫻宮.物部-伊弉弗連為大連。
秋七月,己酉朔壬子,葦田宿禰女-黑媛,立為皇妃,生二男一女.古事記云,葛城之曾都毘古之子-葦田宿禰。
磐坂市邊押羽皇子。
次,御馬皇子。
次,青海皇女。
次妃,幡梭皇女。
生,中磯皇女。

二年春正月,丙午朔己酉,瑞齒別皇子,立為儲君。
五年秋九月,乙酉朔壬寅,皇妃薨。
六年春正月,癸未朔戊子,草香幡梭皇女立為皇后。
三月,壬午朔丙申,天皇玉體不豫,水土弗調.崩于稚櫻宮.時年七十.又,壬申歲正月三日崩,年七十。
冬十月,己酉朔壬子,葬于百舌鳥耳原陵。

天皇所生皇子,二男二女。
兄,磐坂市邊押羽皇子。
次,御馬皇子。
次,青海皇女。
次,中磯皇女。

反正天皇。

諱-瑞齒別尊者,去來穗別天皇同母弟也。
去來穗別天皇二年,立為儲君.時年五十一。
天皇初生于淡路宮.生而齒如一骨,容姿美麗.於是有井,曰-瑞井.則汲之洗太子.時多遲花落有于井中,因為太子名也.多遲花者,今虎杖花也.故稱謂-多遲比。
六年春三月,去來穗別天皇崩。
元年歲次丙午春正月,丁丑朔戊寅,儲君即天皇位。

秋八月,甲辰朔己酉,大宅臣祖木事之女-津野媛,立為皇夫人。
生,香火姬皇女。
次,圓皇女。
復納夫人弟-弟媛。
生,財皇女。
次,高部皇子。
冬十月,都於河內丹比.謂-柴垣宮。
五年春正月,甲申朔丙午,天皇崩.年六十.葬毛須野陵。

天皇所生皇子,一男三女。
兄,高部皇子。

次,圓皇女.
次,財皇女.
次,香火姬皇女.

允恭天皇.

諱-雄朝孀稚子宿禰尊者,瑞齒別天皇同母弟也.

天皇自岐嶽至於總角,仁惠儉下.即壯篤病,容止不便.

五年春正月,瑞齒別天皇崩.此條,日本紀作六年.

時群臣議曰:「方今大鷦鷯天皇之子,雄朝孀稚子宿禰皇子與大香草皇子矣.然雄朝孀稚子宿禰皇子長之仁孝。」即選吉日,跪上天皇之璽矣.

雄朝孀稚子宿禰皇子謝曰:「我之不天,久離篤疾,不能步行.且我既欲除病,獨非奏言而密破身治病,猶勿差.由是先皇責之曰:『汝雖患病縱破身,不肖孰甚於茲矣.其長生之,遂不得繼業.』亦我兄二天皇,愚我而輕之,群卿所共知.夫天下者大器也,帝位者鴻業也.且民之父母,斯則賢聖之職也,豈下愚之任乎?更選賢王宜立矣,寡人弗敢當矣。」

群臣再拜言:「夫帝位不可久曠,天命不可以謙距.大王留時逆眾,不正號位,臣等恐百姓望絕也!願大王雖勞,猶即天皇位!」雄朝孀稚子宿禰皇子曰:「奉宗廟社稷,重事也.寡人篤疾,不足以稱。」猶辭而不聽.於是群臣皆固請曰:「伏計之,大王奉皇祖宗廟,最宜稱.雖天下萬民,皆以為宜.願大王聽之!」

元年歲次壬子冬十有二月,妃-忍坂大中姬命苦群臣之憂吟,而親執洗手水,進于皇子前,仍啟之曰:「大王辭而不即位.位空之,既經年月.群臣・百寮,愁之不知所為.願大王從群望,強即帝位!」然皇子不欲聽,而背居不言.於是大中姬命惶之不知退而侍之,經四五剋.

當于此時,季冬之節,風亦烈寒.大中姬所捧鏡水,溢而腕凝,不堪寒以將死.皇子顧之驚,則扶起謂之曰:「嗣位重事,不堪輒就,是以於今不從.然今群臣之謂,事理灼然.何遂謝耶?」爰大中姬命仰歡,則謂群卿曰:「皇子將聽群臣之請!今當上天皇璽符!」

於是群臣大喜,即日捧天皇之璽符,再拜上焉.皇子曰:「群卿共為天下請寡人.寡人何敢遂辭。」乃即帝位矣.

二年春二月,丙申朔己酉,忍坂大中姬立為皇后.

生兒,木梨輕皇子・名形大娘皇女・境黑彥皇子・穴穗天皇・輕大娘皇女・

八鈞白彥皇子・大泊瀨稚武天皇・但馬橋大娘皇女・酒見皇女.

五年冬十一月,甲戌朔甲申,葬瑞齒別天皇于耳原陵.

二十三年春三月,甲午朔庚子,木梨輕皇子立為太子.以物部麥入宿禰・物部大前宿禰並為大連.

四十二年春正月,乙亥朔戊子,天皇崩.年七十八.

冬十月,庚午朔己卯,葬天皇於河內長野原陵.方年不祥.

天皇所生皇子,五男四女.

兒,木梨輕太子尊.

次,名形大娘皇女.

次,境黑彥皇子.

次,穴穗皇子尊.

次,輕大娘皇女.

次,八鈞白彥皇子.

次,大泊瀨稚武皇子尊.

次,但馬橋大娘皇女.

次,酒見皇女.

安康天皇.

諱穴穗皇子尊者,雄朝孀稚子宿禰天皇第二子也.母曰-皇后-忍坂大中姬命,茅渟毛二岐皇子命女也.

四十二年春正月,天皇崩.

冬十月,葬禮畢之時,太子行暴虐,淫于婦女,國人謗之,群臣不從,悉隸穴穗皇子.

爰太子欲襲穴穗皇子而密設兵.穴穗皇子復興兵將戰.故穴穗括箭・輕括箭,始起于此時也.

時太子知群臣不從,百姓乖違,乃出之匿物部大前宿禰之家.穴穗皇子聞則圍之.大前宿禰出門而迎穴穗皇子.歌曰,云云.在別,乃啟皇子曰:「願勿害太子,臣將議。」由是太子自死于大前宿禰之家.一云,流伊豫國.在簿.

元年十二月,己巳朔壬午,穴穗皇子即天皇位.尊皇后曰-皇太后.追皇太后,贈-太皇太后.以物部木蓮子連公為大連,都遷石上,謂-穴穗宮.

二年春正月,癸巳朔己酉,中蒂姬命立為皇后,甚寵.

初中蒂姬命生眉輪王於草香皇子.乃依母以得免罪,常養宮中.俱見別簿.

三年秋八月,甲申朔壬辰,天皇為眉輪王見殺.天皇年五十六歲,眉輪王七歲.

三年後,乃葬於菅原伏見陵.

天皇無胤.

雄略天皇。

諱-大泊瀨幼武尊者,雄朝孀稚子宿禰天皇第五男也.天皇產而神光滿殿,長而伉健過人.

三年八月,穴穗天皇意將沐浴,幸于山宮.

遂登樓兮遊目.因命酒兮肆宴,爾乃情盤樂極,間以言談.顧謂皇后曰:「吾妹,汝雖親昵,朕畏眉輪。」眉輪王幼年,遊戲樓下,悉聞所語.既而穴穗天皇枕皇后膝,晝醉眠臥.於是眉輪王伺其熟睡而刺殺.

是日,大舍人驟言於天皇曰:「穴穗天皇為眉輪王見殺矣!」

天皇大驚,即猜兄弟等,被甲帶刀,率兵自將,逼問八鈞白彥皇子.皇子見其欲害,默坐不語.天皇乃拔刀而斬.更逼問坂合黑彥皇子.皇子亦知將害,默坐不語.天皇忿怒彌盛,乃復并為欲殺眉輪王,案劾所由.眉輪王曰:「臣不求天位,唯報父仇而已。」坂合黑彥皇子深恐所疑,竊語眉輪王,遂共得間而出,逃入圓大臣宅.

天皇使使乞之.大臣以報曰:「蓋聞,人臣有事逃入王室;未見,君王隱匿臣舍.方今坂合黑彥皇子與眉輪王,深恃臣心,來臣之舍.詎忍送歟?」由是天皇復益興兵,圍大臣宅.大臣出立於庭,索腳帶.時大臣妻持來腳帶愴矣,傷懷而歌曰.云云,在別.

大臣裝束已畢,進軍門跪拜曰:「臣雖被戮,莫敢聽命.古人有言:『匹夫之志難可奪.』方屬乎臣.伏願,大王奉獻臣女-韓媛與葛城宅七區,請以贖罪矣。」天皇不許,縱火燔宅.於是,大臣與黑彥皇子・眉輪王,俱被燔死.時阪合部連贊宿禰抱皇子屍而見燔死,其舍人等收取所燒,遂難擇骨,盛之一棺,合葬新漢擬本南丘.

冬十月,癸未朔,天皇恨穴穗天皇曾欲以市邊押磐皇子傳國而遙付囑後事.

乃使人於市邊押磐皇子,陽期校獵,勸遊郊野曰:「近江狹狹城山君韓俗言:『今於近江來田綿蚊屋野,豬・鹿多有.其戴角類枯樹末,其聚腳如弱木株,呼吸氣息似於朝霧.』願與皇子,孟冬作陰之月,寒風肅然之晨,將道遙於郊野,聊娛情以馳射!」市邊押磐皇子乃隨馳獵.

於是,大泊瀨天皇彎弓驟馬而陽呼曰:「豬有!」即射殺市邊押磐皇子.

皇子帳內佐伯部賣輪,抱屍,駭惋不解所由.反側呼號,往還頭腳.天皇尚誅矣.

十一月,壬子朔甲子,天皇令有司,設壇於泊瀨朝倉,即天皇位.遂定宮,謂-朝倉宮焉.

元年丁酉春三月,庚戌朔壬子,草香幡梭皇女立為皇后.

妃,葛城圓大臣女,曰-韓媛.

誕生,白髮武廣國押稚日本根子皇子尊與稚足姬皇女.

次妃,吉備上道臣女-稚媛,生二男.

長曰,磐城皇子,

少曰,星川稚宮皇子.

次妃,春日和珥臣深目女,曰-童女君.

生,春日大娘皇女.

平群真鳥臣為大臣,以大伴連守屋・物部連目為大連.

二十二年春正月,己酉朔,以白髮皇子立為皇太子.物部布都久留連公為大連.

二十三己未秋八月,庚午朔丙子,天皇疾彌甚.與百寮辭訣,並握手歔歔,崩于大殿.年百二十四歲.御陵在河內之多治比高鷲也.

天皇所生皇子男女.

兒,白髮武廣國押稚日本根子皇子尊.

次,稚足姬皇女.伊勢太神侍祠.

次,磐城皇子.

次,星川皇子.

次,春日大娘皇女.

清寧天皇.

諱-白髮武廣國押稚子日本根子尊者,大泊瀨幼武天皇第三皇子也.母曰-葛城韓媛.葛城圓大臣之女也.

天皇生而白髮,長而愛民矣.大泊瀨天皇於諸子中,特所靈異矣.

二十二年,以白髮武廣國押稚子日本根子皇子,立為太子.

二十三年八月,大泊瀨天皇崩.

妃-吉備稚媛陰謂幼子星川皇子曰:「欲登天皇之位,先取大藏之官矣。」長子-磐城皇子聽母夫人教其幼子語,曰:「皇太子雖是我弟,安可欺乎?不可為也!」星川皇子不聽,輒隨母夫人之意,遂取大藏官,鑰閉外門,戒備乎難,權勢自由,費用宮物.

於是,大伴室屋大連言於東漢掬直曰:「大泊瀨天皇之遺詔,今將至矣!宜從遺詔,奉皇太子!」乃發軍勢,圍繞大藏.自外拒閉,縱火燔殺.是時,吉備稚媛・磐城皇子異父兄-兄君・城丘前來目,隨星川王子而被燔殺矣.

是月,吉備上道臣等,聞朝作亂,思救其媛所生星川皇子,率師船四十艘,來浮於海.

既而聞被燔死,自海而歸也.天皇即遣使,噴讓於上道臣等而奪其所領山部也.

冬十月,己巳朔壬申,大伴室屋大連,率臣・連等,奉璽於皇太子.

元年庚申春正月,戊戌朔壬子,命有司,設壇場於磐余甕栗,陟天皇位.遂定宮,謂-甕栗宮焉.

尊葛城韓媛為-皇太夫人,葛城圓大臣女也.大伴室屋大連・平群真鳥大連,並如故.臣・連・伴造等,各依職位焉.

冬十月,癸巳朔辛丑,葬大泊瀨天皇于丹比高鷲原陵。

二年冬十一月,依大嘗供奉之料,遣於播磨國使者-山部連先祖-伊與來目部-小楯,於赤石郡縮見屯倉首-忍海部造-細目新室,見市邊押磐皇子子-億計・雄計,於思思奉為君,奉養甚謹,以私供給,便起柴宮,權奉安置,乘驛馳奏奉。

天皇愕然驚歎,良以愴懷曰:「懿哉,悅哉!天垂溥愛,賜以兩兒!」語在雄計天皇紀。

三年春正月,丙辰朔,小楯等奉億計・雄計,到攝津國,使臣・連,持節以王-青蓋車迎入宮中。

夏四月,己酉朔辛卯,以億計王為皇太子,以雄計王為皇子。

秋七月,飯豐皇女於角刺宮,與夫初交矣,謂人曰:「一知女道,又安可異,終不願交於男矣!」

五年春正月,甲戌朔己丑,天皇崩于宮。

冬十一月,庚午朔戊寅,葬于河內坂門原陵。

天皇無胤。

顯宗天皇。

諱-雄計皇子尊者,大兄去來穗別天皇孫矣。市邊押磐皇子之子也。更名,來目稚子。雄計王母曰-黃媛,蟻臣女也。其蟻臣者,葦田宿禰子也。譜第曰:「市邊押磐皇子娶黃媛,遂生三男二女。一曰-居夏媛王,二曰-億計王,更名-鳥稚子,更名-大石尊,三曰-雄計王,更名來目稚子,四曰-飯豐女王,亦名-忍海郎女王。一云,敘於億計王之上。五曰-橘王。」

天皇久居邊裔,悉知百姓憂苦,恒見枉屈,若納四体溝隍,布德施惠,政令流行,卹貧養孀,天下親附。

穴穗天皇三年十月,天皇父-市邊押磐皇子及帳內佐伯部仲子,於蚊屋野為大泊瀨天皇見殺,因埋同穴,於是天皇與億計王,聞父見射,恐懼皆逃亡自匿,帳內日下部連-使主,與其子-吾田彥,竊奉天皇與億計王,避難於丹波國余社郡,使主遂改名字,曰-田狹來,尚恐見誅,從茲遁入播磨國縮見山石室而自經死之矣。

天皇尚不識使主所之,勸兄億計王,向播磨國赤石郡,俱改字曰-丹波小子,就仕於縮見屯倉首,吾田彥至此不離,固執臣禮。

白髮天皇二年冬十一月,播磨國司-山部連先祖-伊與來目部小楯,於赤石郡親辦新嘗供物,適會縮見屯倉首縱賞心室,以夜繼晝。

爾乃天皇謂兄-億計王曰:「避亂於斯,年踰數紀,顯名著貴,方屬今宵!」億計王惻然歎曰:「其自道揚見害,孰與全身免死也歟?」天皇曰:「吾是去來穗別天皇之孫,而困事於人,飼牧馬牛,豈若顯名被殺也歟?」遂與億計王相抱涕泣,不能自禁矣。

億計王曰:「然則非弟,誰能激揚大節可以顯著!」天皇故辭曰:「僕不才,豈敢宣揚德業哉?」億計王曰:「弟英才賢德,無以過人!」如此相讓再三而果使天皇自許稱述,俱就室外,居于下風,屯倉首命居竈傍,左右秉燭。

于時夜深酒酣,次第舞訖,屯倉首謂小楯曰:「僕見此秉燭者,貴人而賤己,先人而後己,恭敬擗節,退讓以明理,可謂君子。」於是小楯撫絃,令秉燭者曰:「起舞!」

於是,兄弟相讓,久而不起,小楯噴之曰:「何為太遲?速起舞之!」億計王起舞既了,天皇次起,自整衣帶,為室壽曰:

築立稚室葛根,築立柱者,此家長御心之鎮也。採擷棟樑者,此家長御心之林也。

採置椽椽者,此家長御心之齊也。採置蘆葦者,此家長御心之平也。

取結繩葛者,此家長御壽之堅也。取葦草葉者,此家長御富之餘也。

出雲者新墾,新墾之十握稻之穗,於淺甕釀酒,美飲喫哉,吾子等。

腳日本此傍山,牡鹿之角舉而吾舞者,旨酒,飼香市不以值賣,手掌燦亮,拍上賜,吾常世等。
壽畢,乃赴節歌曰,云云,在別。

小楯謂之曰:「可怜,願復聞之!」天皇遂作殊舞,誥之曰:

倭者,彼彼茅原,淺茅原,弟曰,僕是也。

小楯由是深奇異矣,更使唱之,天皇誥之曰:

石上振之神樞,伐本截末,於市邊宮治天下,天萬國萬押磐尊御裔,僕是也!

小楯,大驚離席,悵然再拜,承事供給,率屬領欽伏,於是,悉發郡民造宮,不日權奉安置。

乃詣京都,求迎二王也,白髮天皇聞,喜咨歎曰:「朕無子也,可以為嗣!」與大臣・大連,定策禁中,仍使播磨國司-來目部小楯,持節將左右舍人,至赤石奉迎之矣。

白髮天皇三年春正月,天皇隨億計王到攝津國,使臣・連,持節以王青蓋車,迎入宮中。

夏四月,立億計王為皇太子,立天皇為皇子。

五年正月,白髮天皇崩。

于時,皇太子-億計王與天皇讓位,久而不處。

天皇姊-飯豐青皇女於忍海角刺宮,臨朝秉政,自稱忍海飯豐青尊。

冬十一月,飯豐青尊崩,葬葛城埴口丘陵。

十二月,百官大會,皇太子億計取天子之璽,置之天子之座,再拜從諸君之位曰:「此天子之位,有功者可以處之!著貴蒙迎,皆弟之謀也!」以天下讓天皇。

天皇故讓,以弟莫敢即位,又奉白髮天皇先欲傳兄位立皇太子,前後故辭曰:「日日出矣,而燭火不息,其於光也,不亦難矣?時雨降矣,而猶浸灌,不亦勞乎?所貴為人弟者,奉兄,謀逃脫離,照德解紛,而無處也!即有處者,非弟恭之義,雄計,不忍處也!兄友弟恭,不易之典,聞諸古老,安自獨輕也?」

皇太子億計曰:「白髮天皇以吾兄之故,舉天下之事,而先屬我,我其羞之,惟王道建利通,聞之者歎息,彰顯帝孫,見

之者殞涕。憫憫縉紳，忻荷戴天之慶，哀哀黔首，悅逢履地之恩。是以克固四維，永隆萬葉，功鄰造物，輕猷映世。超哉邈矣！粵無得而稱。雖是曰兄，豈先處乎？非功而據，咎悔必至。吾聞：『天皇不可以久曠，天命不可以謙拒。』大王以社稷為計，百姓為心者！發言慷慨，至于流涕。

天皇於是知，終不處逆兄意，乃聽而，不即御座。世嘉其能以實讓曰：「宜哉！兄弟怡怡，天下歸德！篤於親族，則民興仁矣！」

元年乙丑春正月，己巳朔，大臣・大連等奏言：「皇太子億計，聖德明茂，奉讓天下。陛下正統，當奉鴻緒，為郊廟主，承續祖無窮之烈。上當天心，下厭民望，而不肯踐祚，遂令金銀藩國，群僚遠近，莫不失望。天命有屬，皇太子推讓，聖德彌盛，福祚孔章，在孺而勤，謙恭慈順，宜奉兄命，承統大業！」制曰：「可！」

乃召公卿・百寮於近飛鳥八鈞宮，即天皇位。百官陪位者皆忻忻焉。都於甕粟宮，立皇后難波小野王。
雄朝三年四月，丙辰朔庚辰，天皇崩于八鈞宮。

天皇無胤。

仁賢天皇。

億計天皇，諱大腳，更名大為，字島郎，雄計天皇同母兄也。天皇幼而聰睿，才敏多識，壯而仁惠，謙恕溫慈。及穴穗天皇崩，避難於丹波國余社郡。

白髮天皇元年冬十一月，播磨國司・山部連小楯，詣京求迎。

白髮天皇尋遣小楯，持節將左右舍人，至赤石奉迎。

三年夏四月，遂立億計天皇為皇太子之事，具在雄計天皇紀。三，或本做二。

五年，白髮天皇崩。天皇以天下讓雄計天皇。為皇太子，如故。事見雄計天皇紀。

三年夏四月，雄計天皇崩。

元年歲次戊辰春正月，辛巳朔乙酉，皇太子尊即天皇位。都於石上廣高宮。

二月，辛亥朔壬子，立前妃・春日大娘皇女為皇后，大泊瀨天皇娶和珥臣深目之女童女君所生也。遂生一男六女。

一曰，高橋大娘皇女。

二曰，朝孀皇女。

三曰，手白香皇女。繼體天皇皇后矣。

四曰，奇日皇女。

五曰，橘皇女。

六曰，小泊瀨稚鷦鷯尊。及有天下，都泊瀨列城。

七曰，真稚皇女。

次，和珥臣日爪女・糠君娘。

生，春日山田皇女。

冬十月，丁未朔己酉，葬雄計天皇于傍丘磐坏丘陵。

七年春正月，丁未朔己酉，立小泊瀨稚鷦鷯尊為皇太子。

十一年秋八月，庚戌朔丁巳，天皇崩于正寢。

冬十月，己酉朔癸丑，葬埴口之坂本陵。口，或本作生。

天皇所生，一男七女。

小泊瀨稚鷦鷯尊。

武烈天皇。

諱小泊瀨稚鷦鷯尊者，億計天皇太子也。母曰春日太娘。

億計天皇七年，立為皇太子。天皇長好刑理，不法令分明，不字疑衍文。日晏坐朝，幽枉必達，斷獄得情。

又頻造諸惡，不修一善。凡諸酷刑，無不親覽。國內居人，咸皆震怖矣。

十一年八月，億計天皇崩。

冬十一月，戊寅朔戊子，皇太子尊命有司，設壇場於泊瀨列城宮，陟天皇位。遂定為都，謂列城宮。此條，日本紀作十二月。

元年己卯春三月，丁丑朔戊寅，春日娘女立為皇后。物部麻佐良連公為大連。

八年冬十二月，壬辰朔己亥，天皇崩于列城宮。

天皇無胤。

先代舊事本紀卷第八 終